

В ПЯТОК 5-я СЕДМИЦЫ ВЕЧЕРА,

**Стихословим кафисму 18. По обычном же стихословии, на Господи
воззвах, поставим стихов 10, и поем самогласен, глас 6, дважды:**

Яко от Иерусалима Твоих Божественных заповедей исходя, / и к страстем
Иерихонским достиг, / славою безчестия житейских попечений привлечен, / в
разбойническая впадох помыслы, / сыноположения благодати ризы от них
совлекохся, / и ранами яко бездушен лежу. / Священник же пришед язву виде
не внят: / и левит, и той возгнушався мимо иде. / Ты же Господи, от Девы
неизреченно воплощься, / изливанием от спасительнаго ребра Твоего, / вольне
излившаяся крове и воды, / якоже елей искапав Христе Боже, / струпы язв
моих мягкостию стягни, / и к небесному совокупи лику, яко Милосерд.

Мученичен: Мученицы Твои Господи, / не отвергошася Тебе, / ни
отступиша от заповедей Твоих: / тех молитвами помилуй нас.

**Таже поем стихиры подобны, Пресвятая Богородицы 3, творящая 7,
глас 6.**

Подобен: Всю отложивше:

Совет превечный открывая Тебе Отроковице, / Гавриил предста, Тебе
лобзая и вещая: / радуйся, земле ненасеянная. / Радуйся, купино неопалимая. /
Радуйся, глубино неудобозримая. / Радуйся, мосте к небесем преводяй, / и
лестнице высокая, юже Иаков виде. / Радуйся, Божественная ручко манны. /
Радуйся, разрешение клятвы. / Радуйся, Адамово воззвание, с Тобою Господь.

Являеши Ми ся яко человек, / глаголет нетленная Отроковица ко
архистратигу: / и како вещаеши глаголы паче человека? / Со Мною бо рекл еси
Богу быти, / и вселитися во утробу Мою. / И како буду, глаголи Ми, / село
пространное, и место священния, херувимы Превосходящаго? / Да не
прельстиши Мене лестию, / не познах бо сласти, / браку есмь непричастна:
како убо Отроча рожду?

Бог идеже хочет, / побеждается естества чин, глаголет безплотный: / и
яже паче человека содеваются, / моим веруй истинным глаголом, / Всесвятая
Пренепорочная. / Она же возопи: / буди Мне ныне по глаголу твоему, / и рожду
Безплотнаго, / плоть от Мене заимствовавшего, / яко да возведет человека, / яко
един силен, / в первое достояние, с растворением.

Слава, и ныне, глас 2:

Еже от века таинство открывается днесь, / и Сын Божий, / Сын Человечь
бывает: / да худшее восприим, подаст ми лучшее. / Солгася древле Адам, и
бог вожделев [быти], не бысть, / Человек бывает Бог, да бога Адама соделает. /
Да веселится тварь, да ликовствует естество, / яко архангел Деве со страхом
предстоит, / и еже радуйся, приносит печали сопротивное. / За милосердие
милости вочеловечивыйся Боже наш, слава Тебе.

Аще ли не совершается последование Преждесвященных, поем стихиры Богородицы на 8. На стиховне самогласен дне, дважды, и мученичен. Слава, и ныне: Языка егоже не ведяше: писан на хвалитех в субботу.

Вход. Свете тихий:

Прокимен, псалом 102, глас 4: Щедр и милостив Господь, долготерпелив и многомилостив.

Стих: Благослови душе моя Господа, и вся внутренняя моя, имя святое Его.

Бытия чтение. [Глава 22, ст. 1 – 18.]

Бысть по глаголю сих, Бог искушаше Авраама, и рече ему: Аврааме, Аврааме. и рече: се аз. И рече: пойми сына твоего возлюбленного, егоже возлюбил еси, Исаака, и иди на землю высокую, и вознеси его тамо во всеожжение, на едину от гор, ихже ти рех. Востав же Авраам утро, оседла осли свое. поят же с собою два отрочища, и Исаака сына своего, и растнив дрова во всеожжение, востав иде, и прииде на место, еже рече ему Бог, в третий день. И возрев Авраам очима своими, виде место издалече. И рече Авраам отроком своим: сядите zde со ослы: аз же и детищ пойдем до онде, и поклонившися, возвратимся к вам. Взят же Авраам дрова всеожжения, и возложи на Исаака сына своего: взял же в руки и огонь, и нож, и идоста оба вкупе. Рече же Исаак ко Аврааму отцу своему: отче. он же рече: что есть чадо? рече же: се огонь и дрова, где есть овча еже во всеожжение? Рече же Авраам: Бог узрит Себе овца во всеожжение чадо. шедше же оба вкупе, Приидоста на место, еже рече ему Бог: и созда тамо Авраам жертвенник, и возложи дрова: и связав Исаака сына своего, возложи его на жертвенник верху дров. И простре Авраам руку свою, взяти нож заклати сына своего. И воззва и ангел Господень с небесе, и рече: Аврааме, Аврааме. он же рече: се аз. И рече: да не возложиши руки твоя на отрочища, ниже да сотвориши ему что: ныне бо познах, яко боишися ты Бога, и не пощадел еси сына твоего возлюбленного Мене ради. И возрев Авраам очима своими виде, и се овен един держимый рогама в саде савек: и иде Авраам, и взял овна, и вознесе его во всеожжение вместо Исаака сына своего. И нарече Авраам имя месту тому, Господь виде: да рекут днесь, на горе Господь явися. И воззва ангел Господень Авраама вторицею с небесе, Глаголя: Мною Самем кляхся, глаголет Господь, егоже ради сотворил еси глагол сей, и не пощадел еси сына твоего возлюбленного Мене ради. Воистинну благословя благословлю тя, и умножая умножу семя твое, яко звезды небесныя, и яко песок вскрай моря, и наследит семя твое грады супостатов. И благословятся о семени твоём вси языцы земнии, занеже послушал еси гласа Моего.

Прокимен, псалом 103, глас 4: Яко возвеличишася дела Твоя Господи, вся премудростию сотворил еси.

Стих: Благослови душе моя Господа, Господи Боже мой, возвеличился еси зело.

Притчей чтение. [Глава 17, ст. 17 – 28: глава 18, ст. 1 – 5.]

Братия в нуждах полезни да будут: сего бо ради раждаются. Муж безумен плещет и радуется себе, якоже поручаясь испорчит друга своего, на своих же устнах огонь сокровищствует. Грехолюбец радуется сваром: а жестокосердый не усрящет благих. Муж удобопреложный языком, впадет в злая: сердце же безумнаго болезнь стяжавшему е: Не веселится отец о сыне ненаказаннем: сын же мудр веселит мать свою. Сердце веселящееся благоиметися творит: мужу же печальну засышут кости. Приемлющему дары неправедно в недра не предуспевают путие: нечестивый же уклоняет пути правды. Лице разумно мужа премудра, очи же безумнаго на концах земли. Гнев отцу сын безумен, и болезнь рождшей его. Тщеты творити мужу праведну не добро: ниже преподобно наветовати властем праведным. Иже щадит глагол произнести жесток, разумен: долготерпеливый же муж премудр, лучше ищущаго науки. Несмысленному вопросившу о мудрости, мудрость вменится: нема же кто себе творит, возмнится разумен быти. Вины ищет муж хотя отлучитися от друзей, на всякое же время поносимь будет. Не требует премудрости муж скудоумен, зане паче водится безумием. Егда приидет нечестивый во глубину зол, нерадит: находит же ему безчестие и поношение. Вода глубока слово в сердце мужа: река же изскачушая и источник жизни. Чудитися лицу нечестиваго не добро, ниже преподобно уклоняти праведное на суде.

И прочее последование Преждесвященных. На трапезе прием вино, труда ради бденнаго хотящаго быти. Повечерие же Малое, и Полунощницу, поем в келлиах. Канон мертвен гласа поем во гробнице.

В СУББОТУ 5-Я СЕДМИЦЫ, НА УТРЕНИ,

Знаменает в час четвертый ноши, молебнаго ради последования акафиста. И собравшися в церковь: благословившу иерею, начинаем Утреню, якоже предписая начало Утрени в четверток Великаго канона.

По шестопсалми, Бог Господь: во глас 8, и поем трижды тропарь косно.

Глас 8:

Повеленное тайно прием в разуме, / в крове Иосифове тщанием предста безплотный, глаголя Неискусобрачней: / Приклонивый схождением небеса, вмещается неизменно весь в Тя. / Егоже и видя в ложеснах Твоих приемша рабий зрак, ужасаюся звати Тебе: / радуйся Невесто Невестная.

Таже стихословим кафисму псалтира 16: Рече Господь Господеви моему: И по исполнении сея, ектенія малая, и поем кондак на среде, со сладкопением, косно. Глас 8:

Взбранной Воеводе победительная, / яко избавльшися от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / Радуйся Невесто Невестная.

На немже кадит диакон святыя иконы, и братию, по чину. На прочих же точию настоятеля и лики. И чтем икосов и кондаков 6. Стоим на чтении. Тии же икосы суть по алфавиту: сиесть, 24, и глаголются от иереа во святом олтаре.

{А} Икос 1: Ангел предстатель с небесе послан бысть, рещи Богородице: радуйся! и со безплотным гласом воплощаема Тя зря Господи, ужасашеся и стояше, зовый к Ней таковая:

Радуйся, Еюже радость возсияет:

Радуйся, Еюже клятва исчезнет.

Радуйся, падшаго Адама воззвание:

Радуйся, слез Евиных избавление.

Радуйся, высоту неудобовосходимая человеческими помыслы:

Радуйся, глубино неудобозримая и ангельскими очима.

Радуйся, яко еси Царево седалище:

Радуйся, яко носиши Носящаго вся.

Радуйся, звездо являющая Солнце:

Радуйся, утробо Божественнаго воплощения.

Радуйся, Еюже обновляется тварь:

Радуйся, Еюже поклоняемся Творцу.

Радуйся Невесто Невестная.

{В} Кондак 2: Видящи святая Себе в чистоте, глаголет Гавриилу дерзостно: преславное твоего гласа неудобоприятельно души Моей является: безсеменнаго бо зачатия рождество како глаголеши, зовый: Аллилуиа.

{Г} Икос 2: Разум недоразумеваемый, разумети Дева ищущи, возопи к служащему: из боку чисту, сыну како есть родитися мощно, рцы Ми? К Нейже он рече со страхом, обаче зовый сице:

Радуйся, совета неизреченнаго таиннице:
Радуйся, молчания просящих веро.
Радуйся, чудес христовых начало:
Радуйся, велений его главизно.
Радуйся, лестнице небесная, еюже сниде бог:
Радуйся, мосте преводяй сущих от земли на небо.
Радуйся, ангелов многословущее чудо:
Радуйся бесов многоплачевный струп.
Радуйся, свет неизреченно родившая:
Радуйся, еже како, ни единагоже научившая.
Радуйся, премудрых превосходящая разум:
Радуйся, верных озаряющая смыслы.
Радуйся невесто невестная.

{Д} Кондак 3: Сила Вышняго осени тогда к зачатию браконейскуую, и благоплодная Тоя ложесна, яко село показа сладкое, всем хотящим жати спасение, внегда пети сице: Аллилуиа.

{Е} Икос 3: Имущи Богоприятную Дева утробу, востече ко Елисавети: младенец же оная абие познав Сея целование, радовашеся, и играющи яко песньми вопияше к Богородице:

Радуйся, отрасли неувядаемыя розго:
Радуйся, плода безсмертнаго стяжание.
Радуйся, делателя делающая человеколюбца:
Радуйся, садителя жизни наша рождшая.
Радуйся, ниво, растящая гобзование щедрот:
Радуйся, трапезо, носящая обилие очищений.
Радуйся, яко рай пищный процветаеши:
Радуйся, яко пристанище душам готовиши.
Радуйся, приятное молитвы кадило:
Радуйся, всего мира очищение.
Радуйся, божие к смертным благоволение:
Радуйся, смертных к богу дерзновение.
Радуйся невесто невестная.

{Z} Кондак 4: Бурю внутрь имея помышлений сумнительных, целомудренный Иосиф смятеся, к Тебе зря небрачней, и бракоокрадованную помышляя, Непорочная: уведев же Твое зачатие от Духа Свята, рече: Аллилуиа.

И паки кондак: Взбранной Воеводе:

Взбранной Воеводе победительная, / яко избавльшися от злых, / благодарственная восписуем Ти раби Твои Богородице: / но яко имущая

державу непобедимую, / от всяких нас бед свободы, да зовем Ти: / Радуйся Невесто Невестная.

Чтем от слова акафиста, на даяния два. Таже стихословим Непорочны, и ектенна.

И паки глаголем кондак: Взбранной Воеводе:

Взбранной Воеводе победительная, / яко избавльшеся от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободы, да зовем Ти: / Радуйся Невесто Невестная.

И другия икосы и кондаки, 6:

{Н} Икос 4: Слышаша пастырие ангелов поющих плотское Христово пришествие, и текше яко к Пастырю, видят Сего яко Агнца непорочна, во чреве Мариине упасшася, Юже поюще реша:

Радуйся, Агнца и Пастыря Мати: радуйся, дворе словесных овец.

Радуйся, невидимых врагов мучение:

Радуйся, райских дверей отвержение.

Радуйся, яко небесная срадуются земным:

Радуйся, яко земная сликовствуют небесным.

Радуйся, апостолов немолчная уста:

Радуйся, страстотерпцев непобедимая дерзосте.

Радуйся, твердое веры утверждение:

Радуйся, светлое благодати познание.

Радуйся, Еюже обнажися ад:

Радуйся, Еюже облекохомся славою.

Радуйся Невесто Невестная.

{О} Кондак 5: Боготечную звезду узревше волсви, тоя последоваша зари: и яко светильник держаще ю, тою испытаху крепкаго Царя: и достигше Непостижимаго, возрадовашася Ему вопиюще: Аллилуиа.

{П} Икос 5: Видеша отроцы халдейстии на руку Девичу, Создавшаго рукама человеки, и Владыку разумевающе Его, аще и рабий прият зрак, потщашася дарми послужити Ему, и возопити Благословенней:

Радуйся, звезды незаходимыя Мати:

Радуйся, заре таинственного дне.

Радуйся, прелести пещь угасившая:

Радуйся, Троицы таинники просвещающая.

Радуйся, мучителя безчеловечнаго изметающая от начальства:

Радуйся, Господа Человеколюбца показавшая Христа.

Радуйся, варварскаго избавляющая служения:

Радуйся, тимения изымающая дел.

Радуйся, огня поклонение угасившая:

Радуйся, пламене страстей изменяющая.

Радуйся, верных наставнице целомудрия:

Радуйся, всех родов веселие.
Радуйся Невесто Невестная.

{К} Кондак 6: Проповедницы богоноснии бывше волсви, возвратишася в Вавилон, скончавше Твое пророчество: и проповедавше Тя Христа всем, оставиша Ирода яко буесловяща, не ведуща пети: Аллилуиа.

{А} Икос 6: Возсиявый во Египте просвещение истины, отгнал еси лжи тьму: идоли бо его Спасе, не терпяще Твоя крепости, падоша. Сих же избавльшиися вопияху к Богородице:

Радуйся, исправление человек:
Радуйся, низпадение бесов.
Радуйся, прелести державу поправшая:
Радуйся, идольскую лесть обличившая.
Радуйся море, потопившее фараона мысленного:
Радуйся, камению, напоивший жаждущия жизни.
Радуйся, огненный столпе, наставляяй суция во тьме:
Радуйся, покрове миру, ширший облака.
Радуйся пище, манны приемнице:
Радуйся, сладости святыя служительнице.
Радуйся, земле обетования: радуйся, из неяже течет мед и млеко.
Радуйся невесто невестная.

{М} Кондак 7: Хотящу Симеону от нынешняго века претавитися прелестнаго, вдался еси яко Младенец тому: но познался еси ему и Бог совершенный. Темже удивися Твоей неизреченней премудрости, зовый: Аллилуиа.

И паки кондак: Взбранной Воеводе:

Взбранной Воеводе победительная, / яко избавльшеся от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / Радуйся Невесто Невестная.

Таже чтем прочее слова акафиста. Псалом 50. И каноны: святого обители со ирмосом на 6: и Пресвятыя Богородицы на 6.

Творение господина Иосифа, егоже краестрочие: Радости приятелище, Тебе подобает радоватися единой. [Аще ли храм Богородицы, поем канон праздника Богородицы со ирмосом на 12. Ирмосы по дважды: тропари на 10.]

Глас 4.

Песнь 1.

Ирмос: Отверзу уста моя, / и наполнятся Духа, и слово отрыгну Царице Матери, / и явлюся светло торжествуя, / и воспою радуяся Тоя чудеса.

{X} Христову книгу одушевленную, запечатленную Тя Духом, великий архангел Чистая, зря возглашаше Ти: радуйся, радости приятелище, Еюже праматерняя клятва разрешится.

{A} Адамово исправление, радуйся Дево Богоневесто, адово умерщвление. Радуйся Всенепорочная, палато всех Царя: радуйся, престоле огненный Вседержителя.

{P} Цвете неувядаемый, радуйся едина прозябшая яблоко благовонное. Радуйся рождшая благоухание единого Царя. Радуйся Неискуобрачная, миру спасение.

{A} Чистоты сокровище, радуйся, Еюже от падения нашего востахом. Радуйся, сладкоуханный крине Владычице, верных благоухай, кадило благовонное, и миро многоценное.

Катавасия: Отверзу уста моя, / и наполнятся Духа, / и слово отрыгну Царице Матери, / и явлюся светло торжествуя, / и воспою радуясь Тоя чудеса.

Песнь 3.

Ирмос: Твоя песнословцы Богородице, / живой и независтный источнике, / лик себе совокупльшия духовно утверди, / в божественней Твоей славе / венцев славы сподоби.

{S} Клас прозябшая Божественный, яко нива неоранная яве, радуйся одушевленная трапезо, хлеб животный вмещая. Радуйся, животныя воды источнике неистошаемый Владычице.

{A} Юнице Юнца рождшая непорочного, радуйся верным. Радуйся Агнице, рождшая Божияго Агнца, вземлющаго мира всего прегрешения. Радуйся теплое очистилище.

{O} Утро светлейшее, радуйся едина Солнца носящая Христа, света жилище. Радуйся, тьму разрушившая, и мрачныя бесы отнюд отгнавшая.

{X} Радуйся, двере едина, Еюже Слово пройде едино, верей и врата адова, Владычице, Рождеством Твоим сокрушившая. Радуйся Божественный входе спасаемых, Богоневесто.

Катавасия: Твоя песнословцы Богородице, / живой и независтный источнике, / лик себе совокупльшия духовно утверди, / в божественней Твоей славе / венцев славы сподоби.

Ектения малая. И по возгласе, кондак: Взбранной Воеводе: И чем другия шесть икосов и кондаков.

{N} Икос 7: Новую показа тварь явлься Зиждитель, нам от Него бывшим, из безсеменныя прозяб утробы, и сохранив Ю, якоже бе, нетленну. Да чудо видяще воспоим Ю, вопиюще:

Радуйся, цвете нетления:

Радуйся, венче воздержания.

Радуйся, воскресения образ облистающая:
Радуйся, ангельское житие являющая.
Радуйся древо светлоплодовитое, от негоже питаются вернии:
Радуйся древо благосеннолиственное, имже покрываются мнози.
Радуйся, во чреве носящая избавителя плененным:
Радуйся, рождшая наставника заблуждшим.
Радуйся, судии праведнаго умоление:
Радуйся, многих согрешений прощение.
Радуйся, одеждо нагих дерзновения:
Радуйся, любы всякое желание побеждающая.
Радуйся невесто невестная.

{Э} Кондак 8: Странное рождество видевши, устранимся мира, ум на небеса преложше: сего бо ради высокий Бог, на земли явися смиренный Человек, хотяи привлеци к высоте, Тому вопиющая: Аллилуиа.

{О} Икос 8: Весь бе в нижних, и вышних никакоже отступи неописанное Слово: снизхождение бо Божественное, не прехождение же местное бысть, и рождество от Девы Богоприятная, слышания сия:

Радуйся, Бога неместимаго вместилище:
Радуйся, честнаго таинства двери.
Радуйся, неверных сумнительное слышание:
Радуйся, верных известная похвало.
Радуйся, колеснице пресвятая, Сущаго на херувимех:
Радуйся, селение преславное, Сущаго на серафимех.
Радуйся, противная в тожде собравшая:
Радуйся, девство и рождество сочетавшая.
Радуйся, Еюже разрешися преступление:
Радуйся, Еюже отверзся рай.
Радуйся, ключу Царствия Христова:
Радуйся, надеждо благ вечных.
Радуйся Невесто Невестная.

{Ш} Кондак 9: Всякое естество ангельское удивися, великому Твоего вочеловечения делу: неприступнаго бо яко Бога, зряше всем приступнаго Человека, нам убо спребывающа, слышаша же от всех: Аллилуиа.

{Р} Икос 9: Ветия многовещанная, яко рыбы безгласная, видим о Тебе Богородице: недоумевают бо глаголати, еже како, и Дева пребываеши, и родити возмогла еси? Мы же таинству дивящися, верно вопием:

Радуйся, премудрости Божия приятелище:
Радуйся, промышления Его сокровище.
Радуйся, любомудрая немудрая являющая:
Радуйся, хитрословесная безсловесная обличающая:
Радуйся, яко обуяша лютии взыскателе:
Радуйся, яко увядоша баснотворцы.
Радуйся, афинейская плетения растерзающая:

Радуйся, рыбарския мрежи исполняющая.
Радуйся, из глубины неведения извлекающая:
Радуйся, многи в разуме просвещающая.
Радуйся, кораблю хотящих спастися:
Радуйся, пристанище житейских плаваний.
Радуйся Невесто Неневестная.

{Σ} Кондак 10: Спасти хотя мир, Иже всех Украситель, к сему самообетован прииде, и Пастырь сый яко Бог, нас ради явился по нам Человек: подобным бо подобное призвав, яко Бог слышит: Аллилуиа.

И паки кондак: Взбранной Воеводе:

Взбранной Воеводе победительная, / яко избавльшеся от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / Радуйся Невесто Неневестная.

Седален, глас 1.

Подобен: Гроб Твой:

Великий воин невещественных ангелов, во град Назарет, представ Царя возвещает Твоего Чистая, и веков Господа: радуйся, глаголя Тебе, благословенная Марие, непостижимая и несказанная глубино, человеков воззвание.

Слава, и ныне, тойже. И паки чтение.

Песнь 4.

Ирмос: Седяй в славе, / на престоле Божества, / во облаце легце, / прииде Иисус Пребожественный, / нетленною дланию, и спасе зовущия: / слава Христе силе Твоей

{Е} Во гласех пений, Дево Тебе вопием Всепетая: радуйся, тучная горо и усыренная Духом. Радуйся свещнице, и стамно манну носящая, услаждающая всех благочестивых чувства.

{П} Очистилице миру, радуйся, Пречистая Владычице. Радуйся лестнице, от земли всех возвысившая благодатию. Радуйся мосте, воистинну преводяй всех от смерти к животу поющих Тя.

{О} Небес превышшая, радуйся, земли основание, в Твоих ложеснах Пречистая, нетрудно носившая. Радуйся червленице, багряницу Божественную омочившая, от кровей Твоих, Цареве силам.

{N} Законодавца рождающая истиннаго, радуйся Владычице, беззакония всех туне очищающего. Недоведомая глубино, высоту неизреченная, браконейская, Еюже мы обожихомся.

{Σ} Тя исплетшую мирови нерукоплетенный венец песнословим, радуйся, Тебе Дево зовуще: хранилице всех и ограждение, и утверждение, и священное прибежище.

Катавасия: Седяй в славе, / на престоле Божества, / во облаце легце, / прииде Иисус Пребожественный, / нетленною дланию, и спасе зовущия: / слава Христе силе Твоей.

Песнь 5.

Ирмос: Ужасошася всяческая / о Божественной славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя / мир подавающая.

{О} Путь рождающая жизни, радуйся Пренепорочная, от потопа греховнаго мир спасающая: радуйся Богоневесто, слышание и глаголение страшное: радуйся пребывание Владыки твари.

{И} Крепость и утверждение человеков, радуйся Пречистая, место освящения славы, умерщвление адово, чертоже всесветлый. Радуйся ангелов радости: радуйся помощи верно молящихся Тебе.

{Ш} Огнеобразная колеснице Слова, радуйся Владычице, одушевленный рай, древо посреде имущи жизни Господа, егоже сладость оживотворяет верою причащающихся, и тли подклонившихся.

{Р} Укрепляеми силою Твоею, верно вопием Ти: радуйся, граде всех Царя, преславная и достослышанная о Нейже глаголана быша яже, горо несекомая: радуйся глубино неизмеримая.

{Е} Пространное селение Слова, радуйся Пречистая, сосуде, Божественный бисер произведшая. Радуйся, всечудное всех к Богу примирение, блажащих Тя Богородице всегда.

Катавасия: Ужасошася всяческая / о Божественной славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя / мир подавающая.

Зде престае канон святаго обители.

Песнь 6.

Ирмос: Божественное сие и всечестное / совершающе празднество / богомудрии Богоматере, / приидите руками воспещим, / от Ней рождаемого Бога славим.

{И} Чертоже Слова нескверный, вина всех обожения, радуйся Пречистая, пророков оглашение: радуйся, апостолов удобрение.

{Е} От тебе роса укану, пламень многобожия угасившая. Тем вопием Ти: радуйся, руно одушевленное, еже Гедеон, Дево, предвиде.

{И} Се Тебе [Дево] радуйся, зовем: пристанище нам буди влающимся, и отиши в пучине скорбей, и соблазнов всех борителя.

{Х} Радости вина, облагодати наш помысл, еже звати Тебе: радуйся неопалимая купино, облаче всесветлый, верныя непрестанно осеняющий.

Таже четверопеснец, егоже краестрочие: Сия песнь Иосифова. Глас 6.

Песнь 6.

Ирмос: Житейское море, воздвигаемое зря / напастей бурю, / к тихому пристанищу Твоему притек, вопию Ти: / возведи от тли живот мой, / Многомилостиве.

Пострадавшие мученицы, и яко камень избранное по земли валяющееся, зиждительство всякое врага совершенно превратиша, и храми Бога Живаго явишася.

Вас молим течение доброе совершивших мученицы, поста течение теши нас добре укрепите, добродетелей совершением просиявших.

Рабы Твоя Владыко, преставльшиися от земли к Тебе преблагому, Твоего Царствия сотвори общники, божественных мученик Твоих священными ходатайствы, Многомилостиве.

Богородичен: Едина всепетая, поющим Тя верно, грехов оставление, и дарований Божественных часть датися, Всесвятому Слову молися, Мати Дево.

Иный, глас 5.

Ирмос: От кита пророка / избавил еси, / мене же из глубины грехов возведи Господи, / и спаси мя.

Память совершающе мученик, Господеви возснем песни, днесь божественно веселящися.

Мечев и огня не убоявшеся, дерзающе в вере страсотерпцы, мучители в сем уязвисте.

Троицен: Троицу Лицы воспеваю Тя, Единице по Существо поклоняюся, Тебе Отче, Сыне и Душе Святой.

Богородичен: Ангел и человек благохваление еси, яко родила еси Дево Христа, Спаса душам нашим.

Стих: Дивен Бог во святых Своих, Бог Израилев.

Смертию живот пренивше, радуется, на небесех живуще, страсотерпцы преславнии Христа Бога.

Стих: Души их во благих водворятся.

Смертию и животом обладая, верую преставльшиися от жития Христе, со святыми Твоими упокой.

Ирмос: От кита пророка / избавил еси, / мене же из глубины грехов возведи Господи, / и спаси мя.

Ектения малая.

И паки поем кондак: Взбранной Воеводе:

И чтем оставльшиися шесть икосов и кондаков.

{Т} Икос 10: Стена еси девам Богородице Дево, и всем к Тебе прибегающим: ибо небесе и земли Творец устрои Тя Пречистая, вселься во утробе Твоей, и вся приглашати Тебе научив:

Радуйся, столпе девства:

Радуйся, дверь спасения:

Радуйся, начальнице мысленнаго наздания:

Радуйся, подательнице божественныя благодати.

Радуйся, ты бо обновила еси зачатая студно:

Радуйся, ты бо наказала еси окраденныя умом.

Радуйся, тлителя смыслов упражняющая:

Радуйся, сеятеля чистоты рождающая.

Радуйся, чертоже безсеменнаго уневещения:

Радуйся, верных господеви сочетавшая.

Радуйся, добрая младопитательнице девам:

Радуйся, невестокрасительнице душ святых.

Радуйся невесто невестная.

{У} Кондак 11: Пение всякое побеждается, спростретися тщася ко множеству многих щедрот Твоих: равночисленныя бо песца песни аще приносим Ти Царю Святый, ничтоже совершаем достойно, яже дал еси нам Тебе вопиющим: Аллилуиа.

{Ф} Икос 11: Светоприемную свещу, сущим во тьме явльшуюся, зрим святую Деву: невещественный бо вжигающий огонь, наставляет к разуму Божественному вся, зарею ум просвещающая, званием же почитаемая, сими.

Радуйся, луче умнаго солнца: радуйся, светило незаходямаго света.

Радуйся, молние души просвещающая:

Радуйся, яко гром, враги устрашающая.

Радуйся, яко многосветлое возсияваеши просвещение:

Радуйся, яко многотекущую источаеши реку.

Радуйся, купели живописующая образ:

Радуйся, греховную отъемлющая скверну.

Радуйся, бане, омывающая совесть: радуйся чаше, черплющая радость.

Радуйся, обоняние Христова благоухания:

Радуйся, животе тайнаго веселия,

Радуйся Невесто Невестная.

{Х} Кондак 12: Благодать дати восхотев долгов древних, всех долгов решитель человеком, прииде Собою ко отшедшим Того благодати: и раздрав рукописание, слышит от всех сице: Аллилуиа.

{Ц} Икос 12: Поюще Твое Рождество, хвалим Тя вси, яко одушевленный храм Богородице: во Твоей бо вселився утробе, содержи вся рукою Господь, освяти, прослави, научи вопити Тебе всех:

Радуйся, селение Бога и Слова:

Радуйся, святая святых большая.

Радуйся, ковчеже позлащенный Духом:

Радуйся, сокровище живота неистощимое.
Радуйся, честный венче царей благочестивых:
Радуйся, честная похвало иереев благоговейных.
Радуйся, Церкви непоколебимый столпе:
Радуйся, царствия нерушимая стено.
Радуйся, Еюже воздвижутся победы: радуйся, Еюже низпадают врази.
Радуйся, тела моего врачевание: радуйся, души моя спасение.
Радуйся Невесто Невестная.

{Ω} Кондак 13: О всепетая Мати, рождающая всех святых Святейшее Слово, нынешнее приемши приношение, от всякия избави напасти всех, и будущия изми муки, Тебе вопиющих: Аллилуиа.

Сей кондак глаголи трижды.

И паки читается 1-й икос: Ангел предстатель: И паки кондак: Взбранной Воеводе:

{А} Икос 1: Ангел предстатель с небесе послан бысть, рещи Богородице: радуйся! и со безплотным гласом воплощаема Тя зря Господи, ужасашеся и стояше, зовый к Ней таковая:

Взбранной Воеводе победительная, / яко избавльшися от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / Радуйся Невесто Невестная.

Таже чтутся Синаксарий: первее Минеи: таже настоящий.

Стихи: Песньми неусыпными благодарственно,

Град во бранех бодрю поет предстательницу.

В сей день неседальную песнь празднуем Пресвятая Владычицы наша Богородицы, вины ради сицевы: Ираклию самодержавное Греческое начальство правящу, Хосрой же Персский царь, видев греческая скиптра смирившася, от Фоки царя мучителя, единого от вельмож своих Сарвара именем, с тысящами многими воинств посылает, вся восточныя страны покорити себе. Предвари бо и прежде, яко десять тем христиан погубив Хосрой: яко жидовом прекупляющим их от него и погубляющим. Начальный же вельможа Сарвар, востоки вся попленив, постиже и до самаго златаго града, иже ныне Скутарь нарицается. Царь бо Ираклий имением общаго злата оскудев священныя сосуды церковныя на златницы претворив, во отдавание большее и совершеннейшее. По Евксинскому же морю с корабли в Персидския страны пришед, потребляет я: и отнюд побеждается, от него Хосрой с прочими воинствы. Помале же и Сирой сын Хосроев, от отца своего отступив начальство себе приемлет, и отца Хосроя убив, царю Ираклию содружися. Хаган же мисонский, и скифский начальник уведев о царе, яко по морю понтскому отшел есть разрешив мир на греки, полки тьмочисленныя подвиг, от западных стран на Константинъ град приходит, на Бога хульныя гласы

возсылая. Абие же купно море убо корабльми, земля же пешими и всадники безчисленными исполнь бяше. Сергей же патриарх Константина града, люди много утешаше, не отпадати, ни разслаблятися: но все упование от души на Бога возносити, и на Матерь Его Пречистую Богородицу: такоже и Вонос Патрикий, иже тогда град правляше, подобная на отвращение ратников устрояше. Подобае бо и нам с помощью вышнюю, и на приличная действовати. Патриарх же божественныя иконы Богоматере, со всем множеством нося обхождаше по стенам свыше, и оттуду утверждение им подавая. Яко убо Сарвар от востока, Хаган же от запада идяста, сожещи окрестная града: патриарх же нерукотворенную Христову икону, и честная и животворящая древа, к сему же и честную ризу Богоматере нося, по стенам обхождаше. Хаган же скифянин сушею, стенам Константина града нападает, со множеством безчисленным, крепкоизрядно оружию утверждени: и толико множество бяше, яко единому гречину с десяти скифяны яве братися. Но неборимая Поборница, обретшимися малыми зело воины в храме Ея, нарицаемем Пигии, множайшия их погуби. Отсюду же грецы дерзновение приемше, и восплескавше, от Воеводы неборимыя Божия Матере, их присно до конца побеждаху. Воззревше же и на примирение, граждане отражени быша. Отвеща бо им Хаган: не прельщайтесь о Бозе, в Негоже веруете, всячески бо утре град ваш прииму. Граждане же слышавше, руки к Богу простираху. Согласившеся убо, Хаган же и Сарвар сушею и морем на град устремляются, козньми пленити желающе: но толико побеждени быша от грек, якоже недовольным быти живым мертвыя жещи. Моноксила же оружников исполнена, недром глаголемым рогом, ко храму Богоматере существу во Влахернах, бури внезапно сильне морю припадши, и разделшуся ему в сечение, с корабли всеми врагов растлешася. И бяше видети то преславное изряднодействие Пречистыя и Богоматере, всех при бреже моря существу во Влахернах извре. Людие же, елико скоро врата отверзше, вкупе вся избиша, и дети и жены на ня вмужествившияся. Начальницы же их возвратишася плачуще купно и рыдающе. Боголюбивии убо людие Константина града, Богоматери благодарение дающе, всенощную песнь, и неседальную Ей воспеша, яко о оных блевши, и преестественною силою содеявши на враги победу. Оттоле убо на воспоминание толикаго и преестественнаго чудесе Церковь сицевый праздник прият, Матери Божии возлагати в настоящее время, егда и поведя Богоматерию бысть. Неседальное же именовася, за еже тогда тако деяти градскому же клиросу, и людем всем. По прехождении же тридесяти и шести лет, при царстве Константина Погоната, агаряне безчисленное воинство водяще, паки на Константинь град нападоша, и семь лет сей борюще, егда и в Кизических странах презимоваху, многия своя погубиша. Таже отрекшеся брани, и с воинством своим возвращающеся, и бывше в мори нарицаемем Силео, вси потопишася, предстательством Всечистыя и Богоматере. Но и в третье паки, при Льве Исавре, агаряне паче множайших тем числом, первее убо Перское разоряют царство, таже Египет и Ливию. Обтекше же и Индию, Ефиопию же и Испанию, напоследок же и на самый царский град воюют, тысящию осмию сот кораблей носими: окруживше убо

его, яко абие расхитити его ждаху. Градстии же священнии людие, честное древо честнаго и животворящаго Креста, и честную икону Богоматере Одигитрии обносяще, стену окружаху, со слезами Бога умилоствляюще. Возмечтася убо, сице агаряном на две части разделитися: и овии убо на болгары воюют, и тамо падают вящше двою тму: овии же оставльшеся на царь град приити, возбранившеся же от вериги, бывшия от Галаты до стен царя града. Восплывшим же негде до места нарицаемаго Сосфен, тамо ветру северну возвевашу, многи корабли их сокрушишася, и погибоша: оставльшиися же в глад зельный впадоша, яко и плотем человеческим прикоснутися, и кал месити и ясти. Таже бежавше, и во Егейскую пучину достигше, кораблецы своя вся, и самех себе глубине морской предаша: град бо силен с небесе спад, возврение моря сотворив, смолу кораблей распусти: и тако множество безчисленное оное воинских кораблей погибе, трем токмо на возвещение оставльшимся. Сих ради убо всех преестественных чудес Всечистыя и Богоматере, настоящий праздник празднуем. Неседальный же речеся, зане просто стояще тогда вси людие в ночь оную, Слова Матери песнь воспеша. И яко во всех иных седети от обычая имуще, в настоящих Богоматере, прости вси слушаем. Твоя поборницы же и непоборимыя Матере молитвами, Христе Боже, от облажащих напастей и нас избави, и помилуй нас яко един Человеколюбец.

Песнь 7.

Ирмос: Не послужиша твари богумудрии / паче Создаваго, / но огненное прещение мужески поправше, / радовахуся поюще: / препетый отцев Господь и Бог благословен еси.

{А} Воспеваем Тя вопиюще: радуйся, колеснице солнца умнаго, лозо истинная, грозд зрелый возделавшая, вино источающий, души веселящее верю Тя славящих.

{И} Врача всех человек рождающая, радуйся Богоневесто, жезле тайный, цвет неувядаемый процветший, радуйся Владычице, Еюже радости наполняемся, и жизнь наследствуем.

{Р} Ветийствующий не может язык Владычице песнословити Тя, паче бо серафимов возвысилася еси, рождши Царя Христа. Егоже моли граду сему избавитися от многих искушений.

{Е} Хвалят Тя блажаще концы, и любовьию зовут Тебе: радуйся свитче, в немже перстом написася Отчее Слово Чистая. Егоже моли, в книги животных, рабом Твоим написатися Богородице.

{И} Молим раби Твои, и приклоняем колена сердца нашего: приклони ухо Твое Чистая, и спаси скорбьми погружаемая присно, и соблюди от всякаго вражия пленения Твой град Богородице.

Иный, глас 6.

Ирмос: Росодательну убо пещь содела ангел / преподобным отроком, / халдеи же опаляющее веление Божие, / мучителя увеща вопити: / благословен еси, Боже отец наших.

Пресветлое собрание божественных Твоих мучеников Многомилостиве, во свете Твоем незаходимем ныне жительствует. Тех молитвами просвещение, и грехов очищение подаждь всем Христе.

Коль красное время, еже нам дал еси воздержания Господи: в немже ущедри души наша яко Благ, молитвами святых страдалец, красныя и честныя возлюбивших страсти Твоя.

Прешедшия многоболезненную бурю жития рабы Твоя, устремивши в пристанище Владыко жизни, вопити со всеми избранными: благословен еси Господи Боже отец наших.

Богородичен: Закона Дателя Приснодево рождающая моли, беззакония отъяти вся, во время ныне настоящее, добре произволившим обучатися божественнаго поста тщанием.

Иный, глас 5.

Ирмос: Благословен еси Боже, / видяй бездны, / и на престоле славы седяй, / препетый и преславный.

Благословен еси Боже, показавый доблю о Тебе страждущия мученики, препетый и препрославленный.

Благословен еси Боже, стратотерпцы молитвенники нам к Тебе подавая, препетый и препрославленный.

Троицен: Благословен еси Боже, един убо Естеством, Лицы же трем познаваемый, препетый и препрославленный.

Богородичен: Благословен еси Боже, рождейся безсеменно, и Рождшую показавый чистотствующую, препетый и препрославленный.

Стих: Святым иже суть на земли Его, удиви Господь вся хотения Своя в них.

Благословен еси Боже, звери укротивый, и погасивый огонь, в славу святых Твоих, препетый и препрославленный.

Стих: Блажени, яже избрал, и приял еси Господи.

Благословен еси Боже, от смерти в безконечный живот преложивый, верую в житии послужившия Тебе.

Ирмос: Благословен еси Боже, / видяй бездны, / и на престоле славы седяй, / препетый и преславный.

Песнь 8.

Ирмос: Отроки благочестивыя в пещи, / Рождество Богородичо спасло есть, / тогда убо образуемое, / ныне же действующее, / вселенную всю

воздвигает пети Тебе: / Господа пойте дела, / и превозносите Его во вся веки.

{N} Ложесны Слово прияла еси, вся носящаго носила еси, млеко питала еси, манием питающаго вселенную всю, Чистая, Емуже поем: Господа пойте дела, и превозносите во вся веки.

{M} Моисей уразуме в купине великое таинство Рождества Твоего: отроцы же прообразиша сие явственнее посреде огня стояще, и не опаляеми, нетленная святая Дево. Тем Тя почитаем во вся веки.

{O} Прежде прелестию обнажившиися в ризу нетления облекохомся Рождеством Твоим: и сидящи во тьме прегрешений, свет видехом, света жилище Отроковице. Тем Тя поем во вся веки.

{N} Мертвии Тобою оживляются, Жизнь бо ипостасную родила еси, немии прежде, благоглаголиви бывают, прокаженнии очищаются, недужи отгоняются, духов воздушных множества побеждаются, Дево человек спасение.

{H} Миру рождающая спасение, имже от земли на высоту взяти быхом, радуйся всеблагословенная, покрове и державо, стено и утверждение, поющим Чистая: Господа пойте дела, и превозносите во вся веки.

Иный.

Ирмос: Из пламене преподобным росу источил еси, / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

Святых мученик исправлением, небеснии умове преудивишася: тех молитвами, милости Твоя Владыко в нас богато удиви, Щедре.

Огнь Божественною рососою поправшии, страдальцы Господни досточуднии, избавите нас огня мучащаго, ко Владыце теплыми вашими молитвами.

Преблагий Слове, отшедшия от нас православно, жизни сподоби яже на небесех, и святых светлости, добропобедных мученик молитвами.

Богородичен: Молитвами Щедре, Рождшия Тя, и святых мученик, и апостол Твоих, просвети наша души, еже славити Тя, в веселии душевнем во веки.

Иный.

Ирмос: Творца твари, / Егоже ужасаются ангели, / пойте людие, / и превозносите во вся веки.

Лицы мученик святии, помяните любовь воспевающия вы, и превозносящия Христа во веки.

Мечем усекаеми, радовахуся мученицы, поюще Христа, и превозносяще во вся веки.

Благословим Отца, и Сына, и Святаго Духа, Господа.

Троицен: Страннолепно разделяется Троица, и пребывает нераздельна яко Бог: Юже превозносим во вся веки.

Богородичен: Дева Младенца роди, Бог бо из Нея вочеловечися: вся тварь да поет Его во веки.

Стих: Дивен Бог во святых Своих, Бог Израилев.

Столпи мужества явишася, падением диаволим радующесе мученицы, поюще Христа и превозносяще во веки.

Стих: Души их во благих водворятся.

У Авраама внедрится сподоби Господи рабы Твоя, верою преставльшиися к Тебе, и надежду.

Хвалим, благословим, покланяемся Господеви:

Ирмос: Творца твари, / Егоже ужасаются ангели, / пойте людие, / и превозносите во вся веки.

Песнь 9.

Ирмос: Всяк земнородный:

{Ω} Да Тебе вернии, радуйся зовем Тобою радости причастницы бывше присносущныя, избави нас напастей, варварскаго пленения, и всякия иныя раны, за множество Отроковице прегрешений, находящия человеком согрешающим.

{Ω} Явилася еси просвещение наше и утверждение. Темже вопием Ти: радуйся звездо незаходимая, вводящая в мир великое Солнце. Радуйся, Едем отверзшая заключенный Чистая. Радуйся сосуде, миро неистощимое на Тя излианное приемший.

{Σ} Станем благоговейно в дому Бога нашего, и возопиим: радуйся, миру Владычице. Радуйся Марие, Госпоже всех нас. Радуйся, едина непорочная в женах и добрая. Радуйся, столпе огненный, вводящий в вышнюю жизнь человечество.

{Н} Голубице милостиваго рождшая, радуйся Приснодево: преподобных всех, радуйся похвало, страдальцев венчание. Радуйся всех праведных Божественное удобрение, и нам верным спасение.

{Ф} Пощади Боже наследие Твое, грехи наша вся презрев ныне, на сие имея молящую Тя, на земли безсеменно Тебе Рождшую, великия ради милости восхотевшаго вообразитися Христе в человечество.

Иный.

Ирмос: Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено, / Егоже величающе, / с небесными вои Тя ублажаем.

Яко свет, яко солнце возсиявше, всю землю лучами благочестия мученицы, и светилами чудес просветиша, и многобожия тьму разгнаша: ихже молитвами Боже, помилуй нас.

Воинство мучеников непобедимое, всех нас укрепи добре подвизатися, и совершити поста поприще: яко да Божественнаго жития дело совершивше, причастницы будем жизни, веселящися.

Твоя да предварит благодать Господи, от нас страшным преставльшихся повелением Твоим: да окружит их Твоя милость, и да наставит к селением просвещенным светом лица Твоего.

Богородичен: Гласом ангеловым совета Отча Ангела, неизреченно Богородице родила еси: гласы убо рабов Твоих приими, яже во время поста приносим, и сия принеси Богу якоже кадило.

Иный.

Ирмос: Исаие ликуй, / Дева име во чреве, / и роди Сына Еммануила, / Бога же и Человека, / Восток имя Ему: / Егоже величающе, / Деву ублажаем.

Совершающе торжество мученическое, днесь людие воскликнем песньми, поюще Христу подвигоположнику, и победы на враги им подавшему: Егоже в песнях величаем.

Ноготьми растерзаеми, и усецаеми мечем на уды, совокупистесь Христу любезно, всехвальнии мученицы. Тем и ныне на небесех веселящися, о всех молитесь.

Троицен: Едином Существом воспеваю Тя безначальная Троице, честная, живоначальная, несекомая Единице, Отче нерожденный, и рожденный Слове и Сыне, Душе Святыи нас спаси поющих Тя.

Богородичен: Паче ума Рождество Твое Богомати, без мужа бо зачатие в Тебе, и девственно рождение бысть: ибо Бог есть родивыйся, Егоже величающе, Тя Дево ублажаем.

Стих: Святым, иже суть на земли Его:

Доблее воинство Царя всех и Бога, мучеников песньми венчаем людие: тии бо победиша бесовския полки яве, яже воспевающе, Владыку величаем.

Стих: Блажени, яже избрал, и приял еси Господи.

Егда все создание Твое возставиши судитися Христе, яже приял еси, и ныне рабы Твоя верныя помилуй, прости яже в житии прегрешения их, и со святыми Твоими упокой я во веки.

Ирмос: Исаие ликуй, / Дева име во чреве, / и роди Сына Еммануила, / Бога же и Человека, / Восток имя Ему: / Егоже величающе, / Деву ублажаем.

Ексапостиларий.

Подобен: Жены услышите:

Еже от века днесь познавается таинство: Божие Бог Слово, Сын Девы Марии за милосердие бывает. И радость Благовещения Гавриил провещавает, с нимже возопиим вси: радуйся Мати Господня.

На хвалитех: Всякое дыхание: Поставим стихов 4: и поем стихиры, глас 4.

Подобен: Яко добля:

Сокровенное таинство, / и ангелом неведомое, / Гавриил уверяет архангел, / и к Тебе ныне придет единой нетленной и добрей голубице, / и рода нашего воззванию, / и возопиет Тебе Пресвятая, / еже радуйся: / уготовися словом, Бога Слова, / Твоими ложеснами прияти.

Светоносная палата уготовася Тебе Владыко, / утроба чистая Богоотроковицы: / гряди к Сей и сниди, ущедрю создание Твое, / завистно брань приемшее, / и работою удержанное лъстиваго, / и доброту первую погубившее, / и Твоего спасительнаго чающее сошествия.

Гавриил архангел, к Тебе Всенепорочная, / явленно приидет, и возопиет Тебе: / радуйся клятвы разрешение, / падших востание. / Радуйся, едина избранная Богу бывшая. / Радуйся, колеснице солнца славы: / прими Безплотнаго, во утробе Твоей вселитися хотящаго.

Слава, и ныне, самогласен, глас 4:

Языка, егоже не ведяше, услыша Богородица, / глаголаше бо к ней архангел Благовещения глаголы: / отнюдуже верно приемши целование, / зачат Тя Превечнаго Бога. / Темже и мы радуящиеся вопием Ти: / из Нея воплотивыйся непреложно Боже, / мир миру даруй, / и душам нашим велию милость.

Славословие великое и отпуст.

НА ЛИТУРГИИ

Изобразительная. И от канона акафиста, песнь 3 и 6.

1. **Клас** прозябшая Божественный, яко нива неоранная яве, радуйся одушевленная трапезо, хлеб животный вмещая. Радуйся, животная воды источниче неистощаемый Владычице.
2. **Юнице** Юнца рождающая непорочного, радуйся верным. Радуйся Агнице, рождающая Божияго Агнца, вземлющего мира всего прегрешения. Радуйся теплое очистилище.
3. **Утро** светлейшее, радуйся едина Солнца носящая Христа, света жилище. Радуйся, тьму разрушившая, и мрачные бесы отнюд отгнавшая.
4. **Радуйся**, двере едина, Еюже Слово пройде едино, верей и врата адова, Владычице, Рождеством Твоим сокрушившая. Радуйся Божественный входе спасаемых, Богоневесто.
5. **Память** совершающе мученик, Господеви возслем песни, днесь божественно веселящися.
6. **Мечев** и огня не убоявшеся, дерзающе в вере страстотерпцы, мучители в сем уязвисте.
7. **Троичен:** Троицу Лицы воспеваю Тя, Единице по Существо покланяюся, Тебе Отче, Сыне и Душе Святой.
8. **Богородичен:** Ангел и человек благохваление еси, яко родила еси Дево Христа, Спаса душам нашим.

Тропарь, Глас 8:

Повеленное тайно прием в разуме, / в крове Иосифове тщанием предста безплотный, глаголя Неискусобрачней: / Приклонивый схождением небеса, вмещается неизменно весь в Тя. / Егоже и видя в ложеснах Твоих приемша рабий зрак, ужасаюся звати Тебе: / радуйся Невесто Невестная.

Кондак, Глас 8:

Взбранной Воеводе победительная, / яко избавльшися от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / Радуйся Невесто Невестная.

Прокимен, глас 3: Песнь Богородицы:

Прокимен: Величит душа Моя Господа, * и возрадовася дух Мой о Бозе Спасе моем.

Стих: Яко призре на смирение Рабы Своея: се бо от ныне ублажат Мя вси роди.

Апостол дне ко Евреем, зачало 322. [Евр. 9, 24 – 28.]

Братие, Не въ рѣкотворѣннаа во стѣаа вниде хрѣтосъ, противобразааа истинныхъ, но въ самое нбо, нѣ да явитса лицѣ вжїю ѡ насъ, ниже да многожды приноситъ себѣ, якоже первосвѣщенникъ вхѣдитъ во стѣаа (стѣыхъ) по всѣа лѣта съ кровїю чждѣю: понеже подобаше вы емѣ множицею страдати ѿ сложенїа мїра: нѣ же единою въ кончинѣ вѣкѣвъ, во ѿметанїе грѣха, жертвою своєю явїса. **И** якоже лежитъ человекѣмъ единою ѡумрѣти, потѣмъ же сдѣ, такъ и хрѣтосъ единою принесѣса, во еже вознести многихъ грѣхи, второе безъ грѣха явитса, ждѣчимъ егѡ во спїе.

И Богородицы, от тогоже послания, зачало 320. [Евр. 9, 1 – 7.]

Братие: Имѣаше ѡубв перваа скїнїа ѡправданїа слѣбвы, стѣе же людское: скїнїа во соврѣженѣа вїсть перваа, въ нейже свѣтїльникъ и трапѣза и предложѣнїе хлѣбѣвъ, яке глаголетса стѣаа. **По** вторѣй же завѣсѣ скїнїа глаголемаа стѣаа стѣыхъ, златѣ имѣци кадїилицѣ и ковчѣгъ завѣта ѡкованъ всѡдѣ златомъ, въ немже стѣина златѣ имѣцаа маннѣ, и жезлъ аарѡновъ прозѣвшїй, и скрижали завѣта: превѣше же егѡ херѣвїи славы, ѡсѣнѣющїи ѡлтарь: ѡ нїхъже не лѣтъ нѣ глаголати подрѣвѣ. **Сїмъ** же такъ ѡстрѣенымъ, въ первѡю ѡубв скїнїю вїнѣ вхѣдѣхѣ свѣщенницы, слѣбвы совершающе: во вторѡю же единою въ лѣто единый архїерей, не безъ крове, еже приноситъ за себѣ и ѡ людскихъ невѣжествїихъ.

Аллилуиа, глас 8: Воскресни Господи в покой Твой:

Стих: Помяни Господи Давида, и всю кротость его.

Евангелие дне, от Марка, зачало 35. [Мк. 8, 27 – 31.]

Во время оно, иисъ и ѡучнїцы егѡ въ вѣси кесарїи фїлїпповы: и на пѣти вопрошаше ѡучнїкї своѣ, гла имъ: когѡ ма глаголютъ человекѣцы быти; **Онї** же ѡвѣщаша: иѡанна крѣтителѣ: и нїнї илїѡ: дрѣзїи же единого ѿ прѣрокъ. **И** тоѣ гла имъ: вы же когѡ ма глаголете быти; **Ѹ**вѣщавъ же пѣтръ глагола емѣ: ты еси хрѣтосъ. **И** запретїи имъ, да ни комѣже глаголютъ ѡ немъ. **И** начѣтъ ѡучнїти ихъ, якѡ подобаетъ снѣ члѣвѣческому многѡ пострадади, и искѣшенѣ быти ѿ старецѣ и архїерей и книжникъ, и ѡвѣенѣ быти, и въ третїй денъ воскрѣнѣти.

И Богородицы, от Луки, зачало 54. [Лк. 10, 38 – 42; 11, 27 – 28.]

Во время оно, вниде въ вѣсь нѣкѣю: женѣ же нѣкаа именема мѣрѣа прїѣтъ егѡ въ домъ своѣ: и сестрѣ ей вѣ нарицаемаа марїа, еже и сѣдши при ногѣ

іисовѣ, слышаше слово егѡ. **М**арѡа же мо́лваше ѡ мно́зѣхъ слѡжбѣхъ, стѡвши же рече: гдѣи, не врежѣши ли, ѡкѡ сестра̀ мо̀я̀ е́ди́нѡ мѧ̀ ѡста̀ви слѡжѣти; рцѣ ѡ̀убо ѣй, да мѝ помѡжетъ. **Ѡ**вѣща́въ же іисъ рече ѣй: ма̀рѡо, ма̀рѡо, печѣшися ѝ мо̀лвиши ѡ̀ мно́зѣхъ, е́ди́но же ѣсть на по̀требѡ. **М**аріа же бл҃гѡю ча́сть и́збра̀, ѡже не ѡ́и́метса ѡ̀ неѧ̀. **Б**ы́сть же е́гда̀ глаше сѣѧ̀, воздвѣгши нѣкаѧ̀ жена̀ гла́сѡ ѡ̀ наро̀да, рече е́мѡ: бл҃же́но чре́во носѣвшее тѧ̀, ѝ сосца̀, ѡже е́си сосѧ̀. **Ѡ**нъ же рече: тѣ́мже ѡ̀убо бл҃же́ни слы́шати сло́во вѣ́іе ѝ хранѧ́щѣи е́.

Причастен: Чашу спасения прииму, и имя Господне призову.

На трапезе ядим два варения с елеем, и пием вино, благодаряще Всесвятую Владычицу нашу Богу о бывшем от Нея чудеси.